

UKA2019/33

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaanni § 9 imm. 1 allanngorteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni meeqqat illugiimmik angajoqqaallit, tamarmik sulisimappata imaluunniit ilinniartuuppata, kommunip ulluunerani paaqqinniffiitut ulluuneranilu paarsisarfinnut utaqqisut allattorsimaffianni meeqqanut kisimiittunik angajoqqaalinnut sulisimappata imaluunniit ilinniartuuppata assigiimmik pineqarnissaat angujumallugu (Siumup Inatsisartunut ilaasortaaitai)

Aamma

UKA2019/53

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaat allanngorteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Inatsisip allanngortinneratigut qulakkeerneqassaaq, kalaallit nunani allani ilinniartut qitornaasa kommunip meeqqueriviutaanut ulluuneraniluunniit angerlarsimaffinni paaqqinnittarfinnut utaqqisunut allanut naleqqiullugu sallinngortinneqartalnissaat ilinniartup Kalaallit Nunaanni sullivimmi imaluunniit oqartussaaffiit arlaanni sulilernissaminut isumaqatigiissuteqarluni takutissinnaappagu. (Inatsisartuni ilaasortaq Malene Vahl Rasmussen, Demokraatit)

Akissuteqaat

(Ilinniartitaanermt, Kultureqarnermt, Ilageeqqarnermt Nunanullu allanut Naalackersuisoq)

Siullermeerineq

Naalackersuisut siunnersuuteqartut Siumup Inatsisartunut ilaasortaaitai aamma Malene Vahl Rasmussen, Demokraatit, qujaffigiumavaat Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaanni § 9, imm. 1-imi tulleriissarisarnermik malittarisassanik allannguisoqarnissaanik siunnersuutaat pillugu.

Aalajangersakkat pineqartut annertunerusumik allanngortinneqaratik 1978-imiilli atuupput, tassaallutillu aalajangersakkat kommunalbestyrelsit meeqquerivinnut utaqqisoqartillugu tulleriissarinermiinni periusissaannik aalajangersakkat.

Taamaamat Naalackersuisut tulleriissarisarneq pillugu oqallinnissaq ilassilluarpaat. Tassami piffissanngorunarpoq tulleriissarisarnissamik aalajangersakkat pineqartut ullumikkut Nunatsinni ilaqutariit meerartallit minnerunngitsumillu inuiaqatigiit pisariaqartitaannut qanoq naapertuutsiginerisa nalilersoqqinnissaannut.

Taamaattoq Naalackersuisut isumaqarput tulleriissarisarnermik aalajangersakkat allanngortinnissaannik aalajangiinissaq ilisimasaqarluarnerulluni tunngaveqarluni pisariaqartoq, soqutiginnitsit tamatigoortumik peqataatillugit sukumiisumik

paasiniaalluareernikkut, tamatumani ilanngullugit kommunit, suliamik ilisimasallit angajoqqaat aamma kattuffiit minnerunngitsumillu sulisut sulisitsisullu kattuffii.

Naalackersuisut isumaqarput Inatsisartuni aalajangiisoqannginnerani pingaartuusoq, attupinneqartussat tamarmik aperineqarnissaat, ullumikkut tulleriissaarisarnermi meeqqerivinni inissanut kikkut allanut naleqqiullugit salliutinneqarnissaannik inuiaqatigiinni pisariaqartitat sorphaanerinek, tamatumunngalu suut patsisigitinneqarnerinek.

Assersuutigalugu kalaallit ilinniartut nunani allaniittut, Kalaallit Nunaannilu atorfininnissaminnik isumaqatigiissuteqartut, meeqqerivinni inissanut salliutissagutsigit, immaqa aperiumasoqarsinnaavoq soq Nunatsinni ilinniartut assingusunik pisinnaatitaaffeqassannginnerisut, ilinniarnermik naammassinerani illoqarfimmi allami atorfininnginnerminni? Allat immaqa aperiumasinnaapput, soq kalaallinut nunani allaniittunut Nunatsinnut suliarlorlutik uterusuttunut allanut tamanna atuutissannginnerisut? Allallu aperiumasinnaapput, soq aapparit kisermaallu naligiissinneqassanersut, kisermaat illoqarfimmi tikitaminni meeqqanik paarsinermik oqilisaassisinnaasunik ilaqaqartinnagit il.il.

Naalackersuisut kissaatigaat erseqqissarneqassasoq maanna tulleriissaarisarnermi aalajangersakkanik allaffisornikkut aqutsineq soqutiginnitsinit assigiinngitsunit qanoq misigineqartarnerisut, piumasaqaataasinnaasut allat suut atornissaat kissaatigineqarnerisut aamma pingaartitat, pisariaqartitat tulleriissaarinerillu suut aallaavigalugit allannguerusuttoqarumanersut piviunngortitsillunilu.

Nalileruminaappoq meeqqerivinnut tulleriissaarisarnermi malittarisassat allanngortinnerisa suut kinguneriumaarneraat. Tulleriissaarisarnermi malittarisassat allanngortinnginnerini inassutigineqarpoq allannguutit sunik kinguneqarumaarneraat qulaajaqqaarneqassasoq.

Taamaalilluni Naalackersuisut kissaatigaat kommunini utaqqisoqartarneranik ajornartorsiutit nikerarnerusumik ataatsimoortumillu paasisaqaqqaarfiginissaat, Inatsisartut inatsisaanni aalajangersakkanik allannguisoqarnissaannik aalajangiinissaq sioqqullugu. Naggasiullugu ilisimatitsissutigineqarsinnaavoq, meeqqerivinnut tunngatillugu Periusissiamik Iliuusissanillu Pilersaarummik suliamut maanna ingerlasumut atatillugu killiffimmik nalunaarut 2020-mi ukiakkut saqqummiunneqassamat, tassanilu pineqartumut tunngatillugu suliniuteqarfissat nutaat siunnersuutigineqassammata.

Taamaammata Naalackersuisut ima allannguutissatut siunnersuuteqarumapput:

Inatsisartunut 2020-mi ukiakkut ataatsimiinnermi nassuiaammik saqqummiussinissaq siunertaralugu, Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaanni § 9, imm. 1-imi tulleriissaarisarnermik aalajangersakkat nalilerneqarnissaannik Naalackersuisut peqqunneqarnissaannik siunnersuut.